



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM

**VCL e busetsa
sechabeng**


6

**LHDA e tšehetsa
mabelo**

11



IEC E ROALLA LE SA SELE

www.moeletsioabasotho.co.lsRe se re fumaneha ho
marangrangEmail: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

Matsoho aa hlatsoana

Madona o nanabetsa letsoho

Tšelisio Thakholi

Ha ho ntho e ntle joaloka ho khutlisetsa sechabeng, haholo haeba o ile oa fumana molemo o itseng ho sona. Ho thoe ngoana ea salleng o shoela tharing, mona ke bona hantle hore selo sa phakoe se ile sa hlomola tsuonyana.

Bohle ba nang le bokooa hangata b'a nyefoloa le hona ho sekisetsoa linthong tse ngata tse ba amang, esita le ho se eloe hloko kapa hona ho mameloa. Kampani ea VCL e ntse mosebetsi oa bohlokoa o bileng o babatsehang haholo, ka ho utloa kapa hona ho qenehela Lehae la St. Angela la bana ba nang le bokooa. E ba phalletse ka ho lokisa marulelo a neng a nela haholo nakong ena eo ho tšolohang lipulang.

Joale e ne e le bothata bakeng sa bana ha ho le tjena, hobane joale matšoenyeho a bona a ne a sae meriting. Taba ena ha ea ba ho lokisa marulelo feela, e bile ea ba kenyetsa li-solar geser le lipompo tsa metsi. Joale kaholimo ho tsohle VCL ea itlamea ho fana ka lijo le thepa ea ho pheha bakeng sa selemo kaofela.

Hona hore ka mohato ona ho lebisa ho polokeho, bophelo bo botle, boiketlo le seriti sa bana. Ruri morero ona ha oa tlameha hore ke oa mohau feela, hobane ngoana e mong le e mong o na le tokelo ea ho phela sebakeng se sireletsehileng se nang le seriti.

Bana ba nang le bokooa hase ho fumana tlhokomelo feela ea liphallelo, empa ba lokela ho fumana litšebeliso le tikoloho e sireletsang litokelo tsa bona.

Re sa bolela re leboha makhotla ka tšebetso ea ona. Kamor'a lilemo tse ngata nyeoe ea e mong oa setho sa Sepolesa sa Lesotho ea ileng a bolaoa ha morao a epolloa hobane hona le litaba e fihla pheletso kajeno. Lekhotla le Phahameng le fane ka kahlolo ho litlohi tsa molao e bile e ne e le lithoo tsa sepolesa.

Ke litaba tse makatsang haeba batho ba tšepetsoeng ho boloka sechaba se sireletsehileng e ba joale ke bona ba fanang ka litaba tsa bohata ho pata bopaki, che hona ke taba, ke maholi a patile maeba. Batho ba tsoelana bora, ba qetella ba sebelisa matla ao ba a filoeng ho sireletsa sechaba, joale bona ba etsa tlolo ea molao e boima ea ho bolaea mosebetsi 'moho le bona. A! ketso e malimabe ruri.

Moahloli o re boiteko ba ho pata tlolo ea molao, ho se ngoliso ea ho tsoaroa ha mofu le ho nyamela ha litlaleho tsa bohlokoa lipatlisosong li sentse tsamaiso ea toka. Bonang feela seo se le hlahelang, le ne le re le tla fella kae.

LTDC le LEMRA li entse taba ea bohlokoa ea ho kopanya libini e le ho khotaletsa lerato la naha, bonngoe le boikhohomoso ba bochaba ka 'mino. Mokete ke o moholo oa lilemo tse 60 Naha ea Lesotho e ipusa, 'me hona hore Mosotho e mong le e mong a be le karolo eo a e nkang.

Libini li filoe monyetla oa ho qapa pina e tla pinoa mohla mokete, 'me pina ena e tl'o ba ea meloko e fapakaneng ea libini le molaetsa o akaretsang oa pina. Re le sechaba sa Basotho re tsetselela khotso le bonngoe ba libini tsa rona. Bochaba ke e 'ngoe ea lintho tse hohelang bahahlaoli, kaha baeti ba rata bo bona tsela eo batho ba phelang ka eona le ho ithuta meetlo ea bona, 'me seo se tla etsa hore moruo oa naha o nyolohe ka potlako.

Hoba le chelete ha oa lekana, ho bohlokoa le ho tseba ho e sebelisa, ho e boloka le ho e holisa ka bohlae. Sechaba sa Basotho bohlo ba sona se bonahala se le tlasa khatello e matla ea likoloto, leha ba ntse ba fumana meputso ea khoeli le khoeli. Lebaka le leholo le mabaka a ho ba le taolo e fokolang ea chelete. Sechaba se hloka thuso e kholo ka tatiso ea tšebeliso ea chelete. Ke ka hoo CBL e tsoileng letšolo ka ho ruta le ho fana ka boeletsi ka tšebeliso ea chelete.

CBL e elelletsoe hore taba ea lipuisano ka chelete li se ke tse etsahala hang feela ka selemo, empa e be karolo ea bophelo ba letsatsi le letsatsi. Mathoasong a selemo sa 2026, Basotho ba ile ba qhekelloa ka bosholu le bomenemene ba lichelete, ka ho tleloa ka masene ka ho hapa Basotho ka litšepiso tsa meputso ka ho shebella lipapatso.

Sechaba se sengata se setse lepalapaleng, beng ba taba ba tsoile ka tseo ba tsoang ka tsona. Basotho ba aparetsoe ke tla le bofuma, hoja re se ntse re hula ka thata.

MOLIMO A BOLOKE LESOTHO LE BASOTHO

Sengoli sa libuka e bile e le morupeli, Monghali Kabelo Madona, o ile a tsoarela bacha ba Setereke sa Leribe litlholisano tsa ho ngola lihlahlobo mabapi le buka e ncha eo a sa tsoae khakola ea Moleboheng, moo Kananelo Masoebe oa St. Monicas e bileng eena mohloli ea ileng a ikhapela chelete e kaalo ka M2,000.00.

Mocha ea hlahileng boemong ba bobeli e bile Puleng Ntlaedwa oa Qoqolosing Ha Kabelo ea ikhapetseng chelete e kaalo ka M1,500.00, borarong ea ba Mpolokeng Thelisi oa Ha Lesiamo ea ileng a iphumanela chelete e kaalo ka M1,000.00, ha boemong ba bone e bile Motebang Motsamai ea Qoqolosing Ha Tšialala ea fumaneng M500.00.

Puisanong le Monghali Madona o hlalositse hore ho bala ho bohlokoa haholo, kaha ho chorisa kelello ea motho empa ka lehlakoreng le leng morero o moholo oa hae ke ho tliša phethoho bophelong ba bacha. "Bacha bana bao e leng bahloli chelete eo ba e fumaneng e tliš'o ba thusa haholo ka malapeng le bophelong ba bona ba letsatsi." A rialo

O re taba-tabelo ea hae e kholo ke ho thusa bacha le ho ba tataisa e le hore batle ba be le bokamoso bo chabileng. A tiisa hore taba ena ea ho kenya letsoho ho ntlafatsa bophelo ba bacha, o e rata ka pelo eohle ea hae kaha bacha ba phela tlotsing e kholo ea tla le tlhobolo ka lebaka la tlhokahalo ea mesbetsi. "Me taba e kholo ea ka ke ho thusa bacha ka sohle seo ke nang le sona ho fetola bophelo ba bona." Ke eena eo.

Puisanong le e mong oa bacha ba hlahileng boemong ba pele, Kananelo Masoebe o supile hore o ikutloa a thabile haholo, hobane chelete eo a e fumaneng o tliš'o e sebelisa bakeng sa ho tliša lefela lihlahlobo tseo a tlang ho lingola ka Pulungoana monongoaha, e le hore a tle a tsebe ho iphumana e le e mong oa liakhente tse tlang ho tsebahala kahare ho Makhotla la Lesotho.


O re kahare ho buka ea

Moleboheng o ithutile li-bopeho tsa batho ba bangata, empa ka ho khetholoha sa Thizza le Moleboheng ea e entseng hore buka ena e kape mollo ka monate. O re buka ena e ba rutila hore e le banana ha se lintho tsohle tse kholo tse nepahetseng, le hore hangata banana ba oela lerabeng ha bonolo, ka hobane ha ba bona lintho tse ntle tseo e bang ba li thabela joaloka Moleboheng, ba lokela ho inahana pele "hobane lintho tseo tse joalo ha se tsa rona."

O re banana ba lokela hore ba ithute lintho tse ntle le ho lisebeletsa, e le hore ba tle ba qetelle ba ena le tsona. A bontša hore Moleboheng o ile a khahloa ke lintho tseo a sa kang a lisebeletsa, a ba a qetella a lahilele bokamoso ba hae, hoo a

heng o ile a sebelisa bottle ba hae hampe, hobane a ne a utloa e ka bottle ba hae ke bona bo ka mo thusang ho hohela batho ba bohlokoa a sa utlosisi hore o tsoanetse hore a ithute a kene sekolo, 'me h'a ntse a ruteha ke tselo eo a bang motle haholo kateng." a rialo.

O re motho e mong oa bohlokoa ea khotseng tse molemo ho eena bukeng ena, ke Thulo ea ileng a ba le mamello ho fihlela a eba le katleho. O re ho latela sengoli sa buka ena, Thulo ke mohlankana ea neng a etsoa lapeng le futsenehileng a bile a sokola lintho tse ngata bophelong, empa o ile atleha kaha a ne a tseba hore ena toro ea hae ke efe. A tiisa hore buka ena e tsoere molaetsa o matla o bileng o le molemo ho



ileng a qetella a mathile kamor'a Thizza ea neng a ena le lintho tsoe e leng Moleboheng a neng a tseba hantle le pelong ea hae hore ha se tsa hae, o mpa a khahluoe ke tsona.

O re o boetse a ithuta hore bottle ha feela motho a bo sebelisa hampe, joaloka Moleboheng, bo fetoha lefela la mafelane. "Molebo-

bacha, 'me a ba kopa ho e bala ka botebo bo boholo.

A qetella ka ho thoholetsa le ho leboha sengoli sa buka ena, ka tšebetso eo a ba fileng eona, 'me a mo kopela mahlohonolo a mangata a tsoang ho Morena Molimo. A khotatsa le bacha ba sa atlehang hore ba se nyahame, kaha tsena e sa le linyane likholo li sa tla.

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšelisio Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

Ba fuoa kahlolo kamor'a lilemo

Nthabeleng Seithleko

Lekhotla le Phahameng le boletse hore pele ho liket-sahalo tse ileng tsa lebisa lefung la Constable Mokalekale Khetheng, ho ne ho e-na le bora ba boetapele kahare ho tšebeliso ea Sepolesa sa Lesotho (LMPS) khahlanong le mofu.

Polelo ena e entsoe ke Moahloli Charles Hungwe nakong ea kahlolo ea mapolesa a mabeli a seng a tlohetse mosebetsi, a fumanoe a le molato oa polao ea Khetheng le liqoso tse ling tse amanang le nyeoe eo.

Superintendent ea seng a tlohetse mosebetsi, Thabo Tsukulu 60, o ahloletsoe ho hlola lilemo tse 15 ka Setsing sa Tlhabollo ea Batšoarua. O fumanoe a le molato oa qoso e 'ngoe ho fapana le'a polao, e leng ho ba mothusi kamor'a hore tlole ea molao e etsoe 'me a ahloleloa lilemo tse 10.

O boetse a ahloleloa lilemo tse tharo ka lebaka la ho sitisa toka, lilemo tse hlano ka lebaka la bopaki ba bohata, lilemo tse tharo ka lebaka la teko ea ho fana ka bopaki ba bohata, hammo ho le lilemo tse tharo ka lebaka la ho susumetsa motho e mong ho fana ka bopaki ba bohata.

Lekhotla le laetse hore lilemo tse tharo tsa bopaki ba bohata li tsamaisane le lilemo tse 10 tsa ho ba mothusi kamor'a tlole ea molao. Lilemo tse tharo tsa teko ea bopaki ba bohata le tsa ho susumetsa bopaki ba bohata le tsona li tla tsamaisana le lilemo tse hlano tsa bopaki ba bohata.

Mosebetsi 'moho le eena, ea seng a tlohetse mosebetsi Inspector Mothibeli Mofolo 58, o ahloletsoe ho hlola lilemo tse 23 ka Setsing sa Tlhabollo ea Batšoarua. Mofolo o fumanoe a le molato liqosong tsohle tse neng li mo qosa, tse kenyeletsang polao eo a fumaneng lilemo tse 18, ho sitisa toka lilemo tse tharo, bopaki ba bohata lilemo tse hlano, teko ea bopaki ba bohata lilemo tse tharo le ho susumetsa bopaki ba bohata lilemo tse tharo.

Lekhotla le laetse hore lilemo tse tharo tsa ho sitisa toka li tsamaisane le lilemo tse 18 tsa polao. Lilemo tse tharo tsa teko ea bopaki ba bohata le tsa ho susumetsa bopaki ba bohata tsona li tla tsamaisana le lilemo tse hlano tsa bopaki ba bohata.

Moahloli Hungwe o boletse hore bora bo neng bo le

teng khahlanong le Khetheng bo ne bo bakiloe ke lipe-laelo tsa hore o ne a amana le linyeoe tsa ho chesoa ha thepa, moo ntlo ea moahi ea amanang le Mookameli oa Sepolesa oa ka Leboea e ileng ea chesoa.

Ho ea ka Moahloli Hungwe, boemo bona bo ile ba baka tikoloho eo Khetheng a neng a nkoa e le "bothata bo lokelang ho rarolloa, ho fapana le mosebetsi-'moho ea neng a lokela ho sireletsoa ke molao."

Moahloli o hatelletse hore bora ba kahare ho sepole-sa ha bo tsamaellane le se ileng sa etsoa Khetheng, ebile ha bo fokotse boima ba polao ea lepolesa le bolailoeng ke mapolesa 'moho le lona.

O itse lepolesa le etsang tlole ea molao le sebelisa matla ao le a filoeng ho sireletsa sechaba, le etsa tlole ea molao e boima ho feta ha ketso e tsoanang e ne e ka etsoa ke moahi feela.

Moahloli o boetse a supile hore boiteko ba ho pata tlole ea molao, ho se ngoliso ea ha ho tsoaroa ha mofu le ho nyamela ha litlaleho tsa bohlokoa lipatlisisong li sentse tsamaiso ea toka.

O itse liketso tsena li amo-ha lelapa la mofu monyetla oa ho tseba 'nete, 'me li ka baka hore batho ba bang ba belaelloe ka phoso.

Lehlakore la babuelli le ile la kopa lekhotla hore le fane ka kahlolo e bobebe, le re toka e lokela ho kopanngoa le mohau. Le ile la boela la kopa hore ho eloe hloko lilemo tse robong tseo baqosuo ba li qetileng chankaneng ba emetse nyeoe. Babuelli ba molao ba ile ba lemosa lekhotla hore le se ke la susumetsoa ke mai-kutlo a sechaba.

Leha ho le joalo, bochochisi bo ile ba kopa kahlolo e boima, bo re baqosuo ba ile ba nyenyefatsa tsamaiso ea toka, 'me ba sebelisa matla a bona e le mapolesa a phahameng ho nyenyefatsa molao.



Baqosuo ba ile ba qosoa hammoho le Inspector Haleokoe Taasoana le Inspector Mabitle Matona, bao lekhotla le ileng la ba lokolla liqosong, kaha ba ne ba qosoa ka polao feela, 'me ha hoa ka ha fumanoe bopaki bo ba hokahanyang le tlole ea molao.

Khetheng o ile a hlokahala ka la 26 Tlhakubele 2016, kamor'a hore a isoe motebong oa Sepolesa sa Hlotse. Hamorao setopo sa hae se ile sa fumanoe se lahliloe Ha Setho, tikolohong ea Ha Mokhalinyane.

Setopo sa hae se ile sa patoa hammoho le litopo tsa batho ba bang ba neng

ba sa tsejoe nakong ea lepatso la batho ba bangata Lepereng ka Tšitoe 2016. Se ile sa epolloa hape ka 2017 kamor'a lipatlisiso tsa mapolesa.

Baqosuo ba ne ba boetse ba qosoa hammoho le Mok'homishenara oa mehleng oa Sepolesa, Molahlehi Letsoepa, eo ho tlalehoang hore o ile a baleha kahar'a naha empa a khutlela Lesotho ka 2025. Hajoale o lokollotsoe ka beile. Ba ne ba boetse ba qosoa hammoho le Letona la Mosebetsi le Khiri, Ts'eliso Mokhosi, eo liqoso khahlanong le eena li ileng tsa hlakoloe.

Kamor'a ho fana ka kahlolo, Moahloli Hungwe o laetse hore kopi ea kahlolo e fetisetsoe ho Mok'homishenara oa Sepolesa, bakeng sa ho nahanela mehato efe kapa efe e ka nkoang, mabapi le karolo ea batho ba sa kang ba hlaha ka lekhotleng, haholo-holo Mok'homishenara oa mehleng oa Sepolesa ea baletsoeng lengolo la qoso le liofisiri tse phahameng, tseo bopaki bo ileng ba phahamisa lipotso ka boitsoaro ba tsona.

Baqosuo ba ne ba emetsoe ke Adv. Karabo Mohau (KC) le Adv. Zwelakhe Mda (KC), ha bochochisi bo ne bo emetsoe ke Adv. Nthabiseng Nkoe.

IEC e ithophela likhetho



Tseliso Thakholi

Komisi e Ikemetseng ea Likhetho(IEC) e bile le 'moka oa baphatlalatsi ba litaba, Ntlho-Kholo ea IEC, Maseru, ka la 23 Loetse monongoa, ka sepheo sa ho ba beha leseling ka maoala a bohlokoa a tšebetso, ao ba seng ba qalile ho sebatsana le ona e le ho matlafatsa boitokisetso ba likhetho tse akaretsang tsa naha, tsa Makhotla a Puso ea Libaka le ho hlalisa ka molao mookameli e mocha oa

likhetho.

Molula-Setulo oa IEC Dr. John Maphephe o boletse baphatlalatsi ba litaba hore Komisi e ntlafalitse molao oa likhetho, ka ho kenyeletsa har'a tse ling tšebeliso ea Tokomane ea Boitsebi-so ea Naha(ID), bakeng sa ho ingolisetsa likhetho le hore Basotho ba se ba tli'o fuoa likarete tsa likhetho ha ba qeta ho ngolisa, 'me ba ileng ba ngolisa nakong eo Komisi e neng e sa fane ka likarete tsa likhetho ba loke-la ho ea li etsa.

A bontša hore Komisi e ikelelitse ho tsoarela hong likhetho tse akaretsang tsa naha le tsa Makhotla a Puso ea Libaka, 'me sena se tla kamorao hore ba ele hloko phapang e kholo e bang teng ea lipalo tsa bakhethi kamor'a likhetho tsena ka bobeli. A supa hore sena se tli'o thusa naha ho fokot-sa litšehelo tse ngata tsa lichelete ha likhetho tsena li lokisetsoa li arohane. "Lichelete tsena li ka sebelisoa molemong oa ho etsa lintlafatso bakeng sa bophelo ba sechaba sa Basotho. Re etse hloko hore likhetho tsena li ngata empa li tsoaroa

ka nako e sa sieaneng haholo, 'me ho bonolo hore lika tsoareloa hong ho fokotsa boima ba litšenyehelo tseo naha e kenang ho tsona." A rialo.

A tsoelapele ho supa hore Komisi e se ena le moralo oo e tli'o sebetsa ka ona ho itokisetsoa likhetho, 'me sechaba se ka ingolisetsa likhetho ka tšebeliso ea marang-rang kapa ka ho ea Letsing tsa IEC libakeng tsa habo bona. A phethela ka hore Komisi e ntšitse boiketso ba batho ba ka khahloang ke ho tla sebetsa le eona



bakeng sa ho hlaloba manane a bakhethi.

Mookameli e mocha oa Likhetho Mofumahatsana Tebello Nthakong o itse ho bohlokoa ho beha sechaba leseling ka litaba tsa IEC, e le hore se lule se ena le tsebo e pharaletseng ka litaba tsa likhetho. A re har'a lintho tseo a li ratang le ho li thabela haholo, ke tsa hore baphatlalatsi ba tla fumantšoa lithupelo ka litaba tsa likhetho, kaha sena se tla ba thusa ho ba le tsebo ea ho phatlalatsa litaba tsa Komisi ba sa litsoake le tsa lipolotiki.

A phethela ka hore IEC e thabetse litaba tsena tsa hore e kopane le baphatlalatsi ba litaba khafetsa, ka sepheo sa ho sebetsa 'moho le hore ba ke ba fumantšoe lithupelo tse tla ba thusa ho matlafatsa litsebo tsa bona mabapi le litaba tsa likhetho. "Taba e 'ngoe ea bohlokoa ho 'na ke ho matlafatsa ho feta mona moo re seng re ntse re etsa likamano tse mofuthu tsa tselisano 'moho ea Komisi le baphatlalatsi ba litaba, kaha e le batho ba bohlokoa haholo ho rona re le IEC." Ke mookameli e mocha eo.

MOELETSI O TŠEHETSA BACHA

Tšeliso Thakholi

Abuti Moeketsi Charles Mongangane eo e leng mocha ea ntseng a le monyenyanane haholo lilemong ea sa tsoa theha lelapa ngoahola, ke mohlala oa 'nete o hlakileng oa bacha, haholo-holo bo-abuti ba Qoqolosing seterekeng sa Leribe oa ho ba mocha oa pele ho bo-abuti oa ho qala khoebo e bitsoang Manzo's Fashion Shop, e rekisang liphahlo tsa boemo bo holimo ka tšebeliso ea marang-rang, ka sepheo sa ho phelisa lelapa la hae le ntseng le le lecha haholo. O boetse ke mohlala o motle oa hore bacha ha ba ka sebelisa mefuta e fapakaneng ea marang-rang ka nepo, baka tseba ho ithlahisetsa mesebetsi ba tlohela ho 'na ba ntse ba lla ka tlhokahalo ea eona.

Leha a qalile ka mofuta ona oa khoebo e ikhethang ea ho rekisa liphahlo ka marang-rang, kajeno o se a ena le Manzo's Fashion Shop toropong ea Hlotse seemelong sa likoloi tsa baeti haufi le li koloi tsa baeti tsa Pitseng moo teng bareki ba ka kenyang 'li-ordera' tsa bona, kapa ba reka liphahlo tse fumanehang hang-hang ka shopong. Manzo's e ikhetholla ka ho pentoa ka 'mala o motle o moputsoa ba leholimo. E boetse e fumaneha ka tsona liphahlo tse ntle tse fumanehang hang-hang moahong oa Ha Tlelai toropong e kholo ea Maseru ka Room 5D. Basotho ba batle ha re tšehetseng Manzo's Fashion Shop e tsebe ho hola ho feta mona. Mongangane h'a bua le koranta ena o libeha tjena:

SE ILENG SA MOKHAHLA HO THEHA KHOEBO

Ha ke qeta ho phethela lithuto tsa ka Sekolong se Phahameng sa Mt. Royal ka 2018, ke ile ka ea Naheng ea Afrika Boroa ho ea leka bophelo, empa ka 2024 ka etsa khomo boe-



la haeno o holile. Ka 2025 ka amoheloa Setsing sa SOS, Hlotse mona, e leng se thusang bacha ho ithuta mesebetsi e fapakaneng ea matsoho.

Ke hona moo ke ileng ka khahloa haholo ke ho theha khoebo ea liphahlo ka marang-rang le tse rekisoang ka shopong. Leha ke e ntse lithuto tsa 'Computer', ho betla lepolanka le ho etsa mesebetsi eohle ea tšepe ea 'aluminium', ke ile ka khahloa haholo ke ena ea ho rekisa liphahlo ho feta tsohle. Le leng la mabaka e ne e le hobane ke ne ke ile ka itjoetsa nakong ea ho ithuta mosebetsi, ha ke

MEFUTA EA LIPHAHLO

Liphahlo tseo ke li rekisang ke tsa mefuta eohle tsa boleng bo holimo, tse ncha, feela ka litheko se tlase. Ha moreki a li batla ka marang-rang hohle moo a teng kahare ho naha, o kenya 'ordara' o romella chelete ka Mpesa kapa Eco cash re mo romella liphahlo tsa hae ka makhetha a maholo li ntse li bolokehile. Liphahlo tsena ke li latala Durban, Johannesburg le Naheng ea China.

BOKAMOSO BA KHOEBO



qetile koetliso ea ka hore hang ha ke tloha mona ke tlameha ho ea itsoarela ka matsoho.

Ho fihlela hajoale khoebo ena e sa ntse e fumaneha literekeng tsa Leribe le Maseru, 'me takatso ea ka



ke hore haeba ho se ho thoe e hanne bonyane ebe le mabenkele literekeng tse tšeletseng. Empa takatso e

kholo ke hore e fumanehe literekeng tsohle le kantle ho naha. Hajoale kaha e sa ntse e hola ke hirile mocha a le mong feela, empa morero ke hore ha e se e holile ke tla hira bacha ba bangata.

MONATE OA HO ITŠEBETSA

Ho itšebetsa ke lintho e monate ka ho fetisisa papisong le ho hiroa, hobane ha motho a hiriloe o sebeletsa motho e mong, eo ka linako tse ling ha o ka e tsa phoso a ka o tebela mosebetsing, kapa a o lefa chelete e hlabisang lihlong. Ha o itšebetsa ke oena mookameli oa khoebo ea hao, ho hola

le ho putlama ha eona ho matsohong a hao. Ka hona o tlameha ho sebetsa ka thata ho bona hore khoebo ea hao ea ntlafala e tsoela sechaba molemo.

HO BACHA

Bacha ba heso le loke-la ho iqalla likhoebo tseo e leng tsa lona, le se ke la sheba taba ea ho hiroa ho feta ho itšebetsa. Re bangata haholo bacha ba ntseng ba batla mesebetsi, etsoe le mahlohonolo a rona h'a tsoane kaha ba bang ba ka atleha ho hiroa ha bang ba se na ho atleha. Ho itšebetsa ho molemo haholo, kaha ho fokotsa tlhokahalo ea mesebetsi. Bacha ha re iketsetseng re ke re tloholle ho lla ka hore mesebetsi ha e eo, empa re ka iqalla seo e leng sa rona. Qala ha nyenyane ho fihlela khoebo ea hao e ba e hola.

LTDC le LEMRA li lokisa pina

Nthabeleng Seithleko

Mokhatlo oa Ntlatfatso ea Bohahlauli Lesotho (LTDC) le Mokhatlo oa Litokelo tsa 'Mino Lesotho (LEMRA) ba sebetse 'moho ho lokisa pina ea naha, e tla lokolloa e le karolo ea mekete ea sehopotso sa lilemo tse 60 tsa boipuso ba Lesotho.

Ha a bua 'mokeng oa bo-ralitaba ka la 21 Loetse monongoaha, Motsamaisi e Moholo oa LTDC, Mamello Morojele, o itse morero ona o reretsoe ho khothaletsa lerato la naha, bonngoe le boikhohomoso ba bochaba ka 'mino le bochaba.

O kopile Basotho ho amohela morero ona le ho nka karolo meketeng, a re sehopotso sa bo 60 sa boipuso e lokela ho ba monyetla oa hore Mosotho e mong le e mong a be le karolo ea nalanane ea naha.

Morojele o boetse a kopa libini tse memetsoeng ho kenya letsoho morerong ona hore li fane ka sohle se matleng a tsona, a re mohato ona ke memo e tiileng e tsoang Lekaleng e bitsang Basotho ho kopana



le ho keteka naha ea bona. O itse pina ena ke karolo ea mesebetsi ea Khoeli ea Bohahlauli, 'me seboka sa bo-ralitaba se tsoaretsoe ho fana ka lintlha mabapi le litokisetso tsa pina, e lebelletsoeng ho binoa nakong ea mekete ea boipuso.

Mookameli oa LTDC Lefapheng la Lipapatso, Phomolo Lebotsa, o itse bonono le boqapi li na le seabo se sehlo bohahlaoling le moruong oa naha, a hlokomela hore 'mino o hokahane haholo le bochaba ba Afrika le mekete.

O itse ha Lesotho le keteka lilemo tse 60 tsa boipuso, ho loketse hore naha e be

le pina e hopotsang Basotho boitsebahatso ba bona, bochaba le lerato la naha. Lebotsa o itse morero ona o reretsoe ho kopanya libini tsa Basotho ho bapatsa naha ka Sesotho, boqapi le 'mino, 'me pina ena e lebelletsoe ho khothatsa meloko e tlang le ho hopotsa Basotho lintho tse ba khethollang e le sechaba.

O boetse a re bochaba ke e 'ngoe ea lintho tse hohelang bahahlauli, kaha baeti ba rata ho bona tsela eo batho ba phelang ka eona le ho ithuta ka meetlo ea bona.

Francis Ntlhoki oa LEMRA o itse mokhatlo ona o filoe boikarabello ke Leka-

la la Bohahlauli, Lipapali, Bonono le Bochaba ba ho hokahanya libini le ho netefatsa hore pina ea boipuso e hlalisoa ka boleng bo hlokalahalang. O itse LEMRA e ile ea tlameha ho khetha libini tse ka kenyang letsoho pineng ena, ho shejoa mefuta e fapakaneng ea 'mino, meloko e fapakaneng ea libini le molaetsa o akaretsang oa pina.

Ntlhoki o itse pina ena e reretsoe ho khothaletsa bonngoe, setso sa Basotho, matlafatso ea bacha le lerato la naha. O itse ho kopantsoe libini tse 16 morerong ona, leha ho bile le liqholotso, ho kenyeletsa

tlhokahalo ea lichelete. O itse pina ena e se e le haufi le ho phethoa, kaha ho setse libini tse peli feela tse lokelang ho phethela likarolo tsa tsona.

Morero ona ke karolo ea mesebetsi e pharalletseng ea Khoeli ea Bohahlauli, e ketekoang tlas'a sehlooho se shebaneng le marang-rang, boqapi le bohahlauli.

Lesotho le tla boela le ikopanya le linaha tse ling lefatšeng ho keteka Letsatsi la Lefatše la Bohahlauli ka la 27 Loetse, tlas'a sehlooho se reng: "Digital Agenda and Artificial Intelligence to Redesign Tourism."



Likoloto le boqhekanyetsi li bubura Basotho

Nthabeleng Seithleko

Ho tseba ho fumana chelete ha hoa lekana ho bohlokoa le ho tseba ho e sebelisa, ho e boloka le ho e holisa ka bohlaele.

O na ke molaetsa o hlalhelletseng Letšolong la Money Month Lesotho 2026, le tsamaisoang ke Banka e Kholo ea Lesotho (CBL), le ileng la qala Mafeteng ka la 9

'Mesa 2026 tlas'a sehlooho se reng "Molemo ke ho bua ka chelete,"

Letšolo lena le fihlile ho batho ba 700, 991 ka mesebetsi ea lona e fapakaneng, ha mananeo a neng a shebane ka kotlolloho le lihlopha ho kenyeletsa batho ba sechaba ka kakaretso, basebetsi, baithuti le bacha ba seng likolong. Taba e kholo ke hore na tsebo ena e ka fetola tsela eo Basotho ba sebetsanang le chelete ka eona.

Banka e Kholo e re batho ba bangata ba fumanang meputso ba ntse ba thatafalloa ke likoloto ka lebaka la taolo e fokolang ea chelete. Sena se etsa hore thuto ea lichelete e be sesebelisoa sa bohlokoa ho thusa malapa ho etsa liqeto tse molemo mabapi le chelete.

Letšolo lena le ruta ka ho etsa moralo oa tšebeliso ea chelete, ho laola likoloto, ho boloka chelete, ho etsa matsete le ho sebelisa litšebeliso tsa lichelete tsa marang-rang.

Lintlha tsa FinScope tsa pejana li bontšitse hore 81% ea batho ba ne ba kenyelelitsoe tsamaisong ea lichelete. Leha ho le joalo, ho ba le polokelo kapa ho sebelisa litšebeliso tsa lichelete ha ho bolele hore motho o na le tsebo e lekaneng ea ho laola chelete.

Ke moo CBL e bonang tlhokahalo ea hore lipuisano ka chelete li se ke tsa etsahala hang feela ka selemo, empa e be karolo ea bophelo ba letsatsi le letsatsi.

Tlhokahalo ena e boetse e totobatsa kotsi ea merero ea bomenemene ea lichelete. Mathoasong a 2026, SGK pyramid scheme e ile ea putlama kamor'a hore batho ba hoheloe ke litšepiso tsa meputso ka ho shebella lipapatso.

Financial Intelligence Unit e ile ea fumana hore bonyane M8Millione e ne e fetile lipolokelong tsa lehae, 'me ea isoa kantele ho naha kapa ho li-crypto, ha lipolokelo tse 11 li amohetse M8.7Millione lipakeng tsa Pulungoana 2025 le 'Mesa 2026.

Sena se bontša hore thuto ea lichelete ha se taba ea batho ba nang le meputso feela. Ke tsebo ea tšireletso e hlokoang ke lelapa, moithuti, mesebetsi le mocha ea batlang ho qala khoebo.

'Musisi oa CBL, Dr. Maluke Letete, o khothalelitse bacha ho se shebe mosebetsi feela e le tsela ea ho aha leruo, empa ba sebelise menyetla e teng, ba ithute ho laola tšebeliso ea lichelete.

A re thuto ea lichelete e lokela ho fetela kantele ho lihlo tsa likopano, e fihle moo batho ba phelang le ho etsa liqeto tsa bona tsa letsatsi le letsatsi.

H'a bua lebitsong la 'Musi oa Setereke Mafeteng, Rorisang Manka o kopile hore lenaneo lena le nkoe e le leeto le isang tsebo litereking tsohle tsa naha.



Vodacom e ntlafatsa St. Angela



Nthabeleng Seithleko

Ka lilemo pula e ne e se e le mohloli oa matšoenyeho ho bana ba bang le bokoa ba lulang Lehaeng la St. Angela Ha Seleso, Maseru, kaha marulelo a neng a se a senyehile a ne a lumella metsi ho kena likamoreng tsa bona tsa boroko.

Kajeno, bothata boo bo fumana tharollo ka mor'a hore Vodacom Lesotho Foundation e lokise marulelo a Lehae lena, ea kenya 'li-solar geyser' le lipompo tsa metsi tse nang le khatello e phahameng, hape ea itlama ho fana ka lijo le thepa ea ho pheha bakeng sa selemo. Tsena li bile ka la 23 Loetse monongoaha.

Taba hase ea ho lokisa moaho feela, ke mohato o lebisang ho polokeho, bophelo bo botle, boiketlo le seriti sa bana ba 53 ba nang le bokooa ba lulang Lehaeng lena.

Lipalo-palo tsa Palo ea Sechaba tsa Lesotho ea 2016 li bontša hore batho ba ka bang 45,000, kapa hoo e ka bang 2.5% ea baahi, ba phela le bokooa. Leha ho le joalo, lipalo-palo tse felletseng le tsa morao-rao, haholo-holo tse shebaneng le bana ba nang le bokooa, li ntse li haella. Tlhahlobo ea boemo ba batho ba nang le bokooa Lesotho e bontšitse hore ho na le likheo mabapi le pokello le khokahanyo ea lintlha tsa bokooa.

Sena se etsa hore ho be bohlokoa hore naha e se ke ea sheba feela palo ea batho ba nang le bokooa, empa e shebe le maemo ao ba phelang tlas'a 'ona le litšebeliso tseo ba li hlokang.

Motsamaisi oa Lehae la

St. Angela, Sr. Reginah Ntisa, o itse tšehetso ea Vodacom Lesotho Foundation e ntlafalitse haholo maemo a bophelo ba bana. O itse Foundation e thusitse ka ho lokisa marulelo, ho kenya 'li-solar geyser' le lipompo tsa metsi tse nang le khatello e phahameng, ha e boetse e itlamme ho fana ka lijo selemo kaofela.

Bakeng sa bana ba lulang moo, liphetoho tse na li ama bophelo ba bona ba letsatsi le letsatsi.

Marulelo a lokisitsoeng a thusa ho ba sireletsa khahlanong le pula, 'li-solar geyser' li fana ka mokhoa o tsitsitseng oa ho fumana metsi a futhumetseng, ha lipompo tsa metsi li thusa ho ntlafatsa phumaneho ea metsi.

Motsamaisi oa Litšebeliso tsa Batho ba nang le Bokooa Lefapheng la Tekano, Bacha le Ntšetso-pele ea Sechaba, 'Mathabo Pama, o itse morero ona ha oa lokela ho nkoa feela e le mohau. O itse ngoana e mong le e

mong o na le tokelo ea ho phela sebakeng se sireletsehileng le se nang le seriti.



Polelo ena e phahamisisa taba ea bohlokoa, bana ba nang le bokooa ha ba lokela ho fumana

tlhokomelo e ipapisitseng feela le liphallelo, ba lokelela ho fumana litšebeliso le tikoloho e sireletsang litokelo tsa bona.

Hlooho ea Vodacom Lesotho Foundation, Tšepo Ntaopane, o itse morero ona ke karolo ea boitlamo ba Foundation ba ho khothaletsa kenyeliso ea batho ba nang le bokooa le matsete sechabeng.

O itse batho ba nang le bokooa ha ba lokelela ho qheleloa ka thoko menyetleng e ba thusang ho ithuta, ho hola le ho kenya letsoho sechabeng. O boetse a totobatsa bohlokoa ba tšebelisoano-'moho lipakeng tsa 'muso, likhoebo, mekhat-

joale le fana ka bolulo le tlhokomelo ho bana ba 53 ba nang le bokooa, ba lilemo li pakeng tsa tšeletseng le 18.

Ntlafatso ea setsi sena e rarolotse bothata bo potlakileng ba marulelo a neng a lutla. Empa tharollo ea nako e telele e hloka hore ho shejoe litlhoko tse ling tsa bana ba nang le bokooa, ho kenyeletsa thuto, bophelo bo botle, phepo e nepahetseng, lisebelisoa tse ba thusang, tlhokomelo le menyetla ea ho nka karolo sechabeng.

Ka hona St. Angela e fana ka thuto e kholo ho sechaba, ha likhoebo, 'muso le mekhatlo ea sechaba ba kopanya lise-

lo ea sechaba le balekane ba ntlafatso.

Lehae la St. Angela le thehiloe ka 1985, 'me ha-

belisoa le tsebo, mathata a bonahalang a le maholo a ka fumana litharollo tse sebetsang.



Berea e tla bonesoa

Nthabeleng Seithleko

Lekala la Matla le Merafo le kopane le Batsamaisi ba Li-hloho tsa Mafapha Teyateyaneng ho ba hlokomelisa ka morero oa Phe-tolelo e Tšoarellang ea ho Potlakisa Pihhlelo ea Matla a Hloekileng (ASCENT), o reretsoeng ho potlakisa ka-toloso ea motlakase naheng ea Lesotho ka bophara, ntle le Mokhotlong le Maseru.

H'a bua kopanong eo, moemeli oa Lekala, Tlaleng 'Molaoa, ka la 22 Loetse monongoaha, o itse mala-pa a ka bang 27 000 a lebelletsoe ho hokeloa mot-lakaseng ka marang-rang a tloaelehileng, ha malapa a mang a ka bang 17 000 a tla hokeloa ka matla a letsatsi.

'Molaoa o itse sechaba se lokela ho tseba hore ho tla etsoa Leano le Khutsu-falitsong ea Tsosoloso ea Bolulo ho tseba masimo le matlotlo a mang a sechaba



a ka angoang nakong ea ho kenya motlakase.

O itse ho tla boela ho et-soe tokomane ea moralo e tla bontša litsela tseo ma-rang-rang a motlakase a tla feta ho tsona, 'me lekala le tla sebetsa haufi-ufi le Kam-pani ea Motlakase ea Leso-tho (LEC).

'Molaoa o boetse a re ho tla thehoa komiti ea litletle-bo e tla thusa ho nolofat-sa puisano lipakeng tsa sechaba le morero. O itse Berea, morero o tla sheba-na le Ha-Bulara, moo ho tla akareletsoa metsanana e

10, athe Ha-Mokhathi, Liko-sheng le Mohlakeng Centre tsona li se li ntse li fumana motlakase.

O itse sebaka se seng ke Ha Mphunyetsane, moo morero o tla akaretsa met-sanana ea teng, ho kenye-letsoa Ha Mopeli le Tha-ka-Mpholo, hammoho le libaka tse ling tse seng li khethiloe.

Sebaka sa boraro ke Ha Tšepe, se kenyeletsang Ha Maqachela, Sekhutlong le Ha Masokooa.

Molaoa o itse morero o tla boela o akarelletse Ha Ma-jara le metsanana ea teng, e leng Ha Pii, Ha Maema, Ha Matelile, Ha Rankali, Ha Seutloali, Ha Kotita, Ha Rasekama le Kholokoe.

O itse Masoeling e tla ba sebaka sa bohloko, se tla akarelletsa Ha Patsoa, Ha Seele, Ha Mahleke le Ha Khanyela.

Ho lebelletsoe hore ra-konteraka ea tla phethahat-sa morero oa ho kenya mot-lakase a tsebisoe sechaba ka Tihakubele, 'me kamor'a moo ho tla hiroa basebetsi ba se nang litsebo ho tsoa metseng ka bomong ho thu-sa tšebetsong ea morero.

Mazenod BOOK CENTRE

27 350 562 / 57396597 (whatsApp)

bookcentre@mazenodprinting.co.ls

akello

LIBRARY

Malebela

Mantšatlala

Mopheme

Sehloho sa liihelhefatsi

Lipapali tsa Basotho

SEBOPEHO-PUO SA SESOTHO 1

SEBOPEHO-PUO SA SESOTHO 2

SCHOOL BOOKS

now available on the Akello Online Library!

Here's how to access them:

1. Download the Akello Reading App.

2. Search for the book you want.

3. Purchase or subscribe online.

4. Download the book

Enjoy reading offline anytime on the Akello App.

https://library.akello.co/

Mofumahali o ne a e-na le lineo

Nthabeleng Seitlheko

Morena oa Sehlooho oa Matsieng, Morena Seeiso Bereng Seeiso, o hlalositse Mofumahali Mamohato Bereng Seeiso, e ne e le mosali ea neng a e-na le litalente tse ngata. Tsena o li buile phanong ea likhau Holong ea Liboka ea 'Manthabiseng, ka la 20 Loetse monongoha.

Morena Seeiso o buile joalo nakong ea Likhau tsa Boraro tsa Naha tsa 'mino, moo a ileng a fana ka Khau ea Queen Mamohato ea Bophelo bohle ho sebini se tummeng, Ntate Mahase.

Seeiso o itse likhau tse-na ke sethala sa ho bontša litalente tsa bonono tsa Basotho, a totobatsa bohlokoa ba ho sireletsa setsi sa boqapi e le hore baetsi ba mesebetsi ea bonono le libini ba fumane moputso o loketseng bakeng sa mesebetsi le litšoantšiso tsa bona.

Ho sa le joalo, Letona la Bohahlaoli, Mohlomphehi Thabo Mputi, le itse 'mino o bapala karolo ea bohlokoa ho thusa baetsi ba oona ho pheta pale ea Lesotho. O itse likhau tsena li tšoaroka nako ea bohlokoa ha naha e keteka lilemo tse 60 tsa boipuso le lilemo tse 200 ho tloha ha Morena Mo-shoeshoe I a theha sechaba sa Basotho.

Mputi o itse 'mino ke sehopotso sa nalane e ruileng ea Basotho, boitsebahatso ba bona le leeto leo sechaba se le nkileng ho theosa le lilemo.

O boetse a re nalaneng ea Lesotho, 'mino e sa le e le karolo ea bohlokoa ea sechaba, o sebelisoa e le sesebelisoa sa puisano, seo ka sona pale ea sechaba e phetiloeng.

H'a bua le batšehetsi ba likhau tsena, Letona le itse hoa khothatsa ho bona Makala a Ikemetseng a theha menyella, moo litalenta tsa Basotho li ka bontšoang le ho phahamisoa.

H'a bua ka baeti ba tsoang naheng ea Afrika Boroa, Mohlomphehi Mputi o itse boteng ba bona bo bontša likamano tse matla lipakeng tsa Lesotho le Afrika Boroa. O itse 'mino o feta meeli ea linaha 'me o kopanya batho ntle le lithibelo tsa meeli kapa lipampiri.

Letona le boetse la hatella hore 'mino ha se boithabiso feela, empa ke mohloli oa boipheliso. O itse 'muso



o ikemiselitse ho tšehetsa baetsi ba 'mino le ho theha tikoloho e ba fang monyetla oa ho fihlela bokhoni ba bona ka bottlalo.

Mohloli oa khau ea sebini

se hloahloa sa Jazz, Ntate Tom Rakoti, o hlalositse leeto la hae la ho itokisetša seo a se bitsilitseng bosiu boo, a ke ke a bo lebala le ka mohla.

Ntate Rakoti o itse o qalile ho itokisetša likhau tsena ka Phupu, a kopa tšehetso le likhetho ho balateli ba hae ho phatlalla le naha, haholo-holo libakeng tse

ka leboea ho Lesotho. O hlalositse Jazz e le 'mino o tsamaeang butle, empa o sa fele, "joaloka leqhubu le tlang butle empa qetellong le fihla moo le eang."A rialo.

Rakoti o itse o qalile ho ngola lipina tsa hae ka 2008 ha a ne a bina le Senqu Jazz Band. Kamor'a hore sehlopha seo se arohane, e ile ea e-ba sebini se ka sehloohong sa Afrotazz Band, pele a qetella a ikemela e le sebini sa boinotsing.

Mohlophisi oa likhau tsa 'mino, Ntate Tšepo Kherenchane, o itse likhau tsa pele tsa naha tsa 'mino li ile tsa tšoaroka ka 2024. O itse selemong sena ho ile ha amoheloa batho ba 800, hoo ba ileng ba fokotsoa ho ba 300, ha tšebetso ea ho khetha bakhethoa e qalile ka Motšeanong.

Batšehetsi ba likhau tse-na ba kenyelletse Banka ea Poso, Lekala la Bohahlaoli, LNIG Hollard, Mohale FM le Maluti Mountain Brewery.



Lesotho Highlands Development Authority

P.O. Box 7332, Maseru 100, Lesotho • Tel: (+266) 22 246 000 / 22 311 280 / 522 52000 • Fax: (+266) 22 310 665 • Email: lhwp@lhda.org.ls

PRESS RELEASE

LHDA LAUNCH THE 2026 LHDA MOKHOTLONG HIGHLANDS MARATHON

Maseru, 23 September 2026: The Lesotho Highlands Development Authority (LHDA) has officially launched the 2026 'LHDA' Mokhotlong Highlands Marathon at an event in Maseru on Wednesday, 23 September 2026 at Lehakoe Club at 15:00 hrs. The launch marks the start of a strategic partnership between the LHDA and Eventful Moments, organisers of the marathon, as part of the 40th anniversary celebrations of the Lesotho Highlands Water Project (LHWP).

Scheduled for Saturday, 6 December 2026, the marathon reflects a shared commitment to promoting tourism, community participation, and sustainable economic opportunities for the highlands communities. Through this initiative, the LHDA seeks to harness sports tourism as a vehicle for regional development while showcasing Mokhotlong's unique natural landscape, rich cultural heritage, and world-class highland terrain.

A defining feature of the marathon is its finish at the iconic Senqu Bridge, one of the landmark infrastructure assets of the LHWP. The event demonstrates how project infrastructure can extend beyond its core developmental function to become a tourism attraction that draws visitors to the region's spectacular landscapes and engineering achievements. It also highlights the growing appeal of the Lesotho Highlands as a high-altitude training destination, a sought-after environment for elite marathon runners and social athletes seeking endurance and performance benefits.

Aligned with the LHDA's 10-Year Strategy, support for the marathon contributes to efforts to diversify livelihoods in project-affected communities, stimulate local enterprise development, and position Mokhotlong as a premier destination for adventure and sports tourism.

"The Mokhotlong Highlands Marathon shows how the infrastructure of the Lesotho Highlands Water Project serves people far beyond water and power. As we mark 40 years of the project, we are opening the highlands to the world, creating opportunities for local businesses, and celebrating the communities who have walked this journey with us," said Tente Tente, Chief Executive of the LHDA.

About the Lesotho Highlands Development Authority (LHDA)

The LHDA is the implementing authority of the Lesotho Highlands Water Project (LHWP), a multi-phase partnership between the Kingdom of Lesotho and the Republic of South Africa. The project delivers water to South Africa and generates hydropower for Lesotho, while advancing livelihoods, environmental stewardship, and socio-economic development in the Kingdom. In 2026, the LHWP marks 40 years since the signing of its founding Treaty.

communications@lhda.org.ls +266 22246000

#ThisIs40 #BuildingBeyondGenerations #MokhotlongHighlandsMarathon



TSA KEREKE

'Moea oa Molimo o ka ho lona'

Tšeliso Thakholi

Ele ho tšoea kete-kele ea lilemo tse 60 Moarekabishopo oa pele oa Mosotho, Mobabatshehi Emmanuel 'Mabathoana OMI a hlokahetse, Moarekabishopo Gerard Lerotholi OMI o hloeselitse badiakone ba bane Mokhahlelong oa Boprista bo Halalelang tšebeletsong e bileng Parish-ing ea 'Ma-Jesu, Roma ka la 19 Loetse monongoaha. Khothatsong ea hae Mo-bishopo Vitalis Marole OMI h'a bua le baprista ba bacha o boletse hore moea oa Morena Molimo o ka ho bona, e leng moea oa bosebeletsi le oa mohau. "Moea

e khoathoang ka lehlaka, empa e lokela ho ba baprista ba lulang ba thabile ka mehla, kaha ke sona sebetsa seo ba tla tseba ho hlola lifefo tseo ba tlang ho kopana le tsona. "Empa e kholo ka ho fetisisa ke hore le tšepe moea oa Molimo o teng kahare ho lona, tšepang Kriste ea itseng ha se lona ba ikhethileng empa ke 'na ea le khethileng." A qetella ka ho ipiletsa ho bakriste ho tšehetsa baprista bana ba bacha ka lithapelo. A re ke boikarabelo ba mokriste ka mong ho sireletsa, ho baballa le ho hlokomela baprista. Lebitsong la LCBC, Mo-bishopo Joseph Sephamola OMI o lebohile sechaba sohle sa Morena Molimo ka ho kenya letsoho le toma ka mekhoha e fapakaneng

Morena Molimo, 'me ka nalanane ea hae eo a re sietseng eona re lokela hore re sireletse seriti sa ba tlokotsing, re ba fe tšepo le ho boloka bonngoe le poelano ka linako tsohle." A rialo. A lebohela baprista ba bacha le ho ba khothaletsa ho latela makhabane a Mobabatshehi 'Mabathoana. H'a fana ka mantsoe a teboho lebitsong la batlotsua ba bacha, Fr. Bartholomy Tšoeunyane o lebohile batsoali, bakriste le Morena Molimo eo e saleng a ba tšehelitse boleleleng ba leeto leo ba le tsamaileng, "me re le lebohela ka ho fumana basebeletsi ba bacha. Re le kopa hore le 'ne le tsoelepele hore tšehetsa, e le hore re tle re be batho ba tlamisang maqeba a hlabiloeng, le ho le tiisa mangole, le ho le



oo ka ona o tla le ruta boikokobetso, o tla le ruta hore le hauhetsoe 'me le lona le lokela ho fana ka mohau." A re ba fuoe mohau oa Molimo hore le bona e tle e be batho ba mohau, 'me ba bitsitsoe hore e il'o ba basebeletsi ba mohau oa Morena Molimo. A re moprista ke motho ea nang le boikokobetso le ho aba mehauhelo ho batho ba bang. "Sekeng la tšaba hobane moea oa Molimo o ka ho lona." O boletse joalo a bile a eketsa ka hore ba tsebe hore ha se bona ba ikhethileng, empa ke Molimo ka sebele ea ba khethileng. A re Morena Molimo o ba bitsitse ho ea ba etsa bahlanka ba hae. Ka hona ba fuoe boikarabelo bo matla Kerekeng le sechabeng sa Morena Molimo. A ba hlokomelisa hore ba qobe bosholu le ho hlokomela hore boprista ha se potele

ho atlehisa mokete ona. A khothaletsa bakriste bohle ho ikhapela makhabane a mangata a Moarekabishopo 'Mabathoana. A re ho bohlokoa haholo ho bua ka menyabuketso ea Moarekabishopo 'Mabathoana hore e hlahelle kantle, 'me re phele ka eona. A re taba e 'ngoe e kholo ea bohlokoa ke hore a tle a qetelle a kena mekhahlelong ena e isang batho khalalelong, e le hore Kereke e ba phatlalatse e le ba halalelang. H'a bua moketeng ona Motlotlehi 'Masenate Bereng Seeiso o boletse hore Moarekabishopo 'Mabathoana e bile pulamaliboho, setsebi le morati oa naha ea habo. A re Mobabatshehi 'Mabathoana ka bophelo bohle ba hae o ile a ababela pitso ea hae ea ho sebeletsa Morena Molimo. "O e ntse tse kholo ho rona re le Kereke le sechaba sa

ruta li 'nete tsa tumelo." O supile hore bona e le baprista ba bacha le ho ba batlotsua ba Morena ba itebohela haholo ho Morena Molimo, hore eena eo ba ileng ba mo kopa ka nako e telele, kajeno o ba sitsitse ka seo ba se kopileng, 'me ke ho bona ho sebelisa hantle sena seo a ba fileng sona. Baprista ba bacha ke Rev. Fr. Bartholomy Tšoeunyane, Rev. Fr. Augustinus Ngatane, Rev. Fr. Sylvester Letlaka le Rev. Fr. Michael Rantho. Ha letsatsi le hlhlamang le phethalang mokete, e bile tšebeletso ea ho hloesetsa ha bo-borothoro ba bane Mokhahlelong oa Bodiakone. Ho feta moo, moketeng ona hone ho boetse ho hopoloa Mobishopo oa mehleng Mohlophahi Augustinus Bane OMI ea neng a tlotsetsoe bobishopo ka la 19 Loetse 2009.

2025-2026 SELEMO A

SONTAHA SA 26 HAR'A SELEMO



Ezekiele 18:25-28
Pesalema 24
Ba-Filipi 2:1-11
Matheus 21:28-32



Khothatso

Tšokoloho ea moetsalibe

Motho ea lokileng hase ea reng "E" ho Morena Molimo, empa ke ea etsang thato ea hae. Motho ea tla pholoha, hase ea qalang hantle feela, empa ke ea qetelang hantle. Hase boithatelo bo botle ba rona feela ho tla re isa leholimong, empa ke liketso tsa rona tse ntle. Ha re na ho lahleha ka baka la libe tsa rona feela, empa ka baka la ho hana ho sokoloha le ho baka.

Mantsoe ana 'ohle a akaretsa thuto eo re e fumaneng kajeno ho Moprofeta Ezekiele le ho Morena oa rona Jesu Kriste papisong ea bara ba babeli ba motho.

Bajodi ba khale ba ne ba hopola hore libe tsa batsoali li ne li lefelloa ke bana ba bona. Esita le baapostola ba ne ba e-na le khopolo ena e fosa-hetseng. Ka tsatsi le leng ba bona monna ea tsoetsoeng e le sefofu 'me ba botsa Jesu, ba re: "Ea entseng sebe ke mang, ke eena kapa ke batsoali ba hae, ha e le moo a tsoetsoe a fufetse"? (Jn 9:1-2).

Moprofeta Ezakiele o hlalosa hantle hore motho ka mong ke eena ea ikarabellang holim'a libe tsa hae. Erekaha motho a e-na le bolokolohi, ke eena ea nang le matla a ho fetola motho ea lokileng kapa moetsalibe. Ke 'nete, litšusumetso tsa ba bang kapa mehlala ea bona e mebe e ka re khannela sebeng. Empa mohla re ahloloang ke Molimo, re tla ema re le bang ka pel'a moahloli oa rona, re ikarabelle re le inotši ka tsohle tseo re li entseng, re sitoe ho ithoekisa molato re o beha ho ba bang. Hobane motho ka mong o ikarabella holim'a liketso tsa hae, tseo a li entseng ka bolokolohi.

Ka mokhoa o tšoanang, hase batsoali ba rona ba ka re isang leholimong. Leha ba ka fana ka kholiso e nepahetseng le mehlala e lokileng ea bophelo bo halalelang ba sekriste, kamoo e leng tšoanelo kateng, ke e mong le e mong oa rona ea ikhethelang tsela ea hae ea bophelo, 'me ea tla ikarabella holim'a liketso tse ntle kapa tse mpe tseo a li entseng ka bolokolohi.

Re tšoanetse ho hopola hore, ha re ntse re phela, re na le matla a ho fetola batho ba lokileng kapa baetsalibe. Ha re tsebile bofokoli ba rona le litšekamelo tsa rona, re lokela ho sebetsa ka matla le ho tsamaea kamehla tseleng e nepahetseng, leseling la Kriste. Re hopole hape hore Morena Molimo ha batle lefu la moetsalibe, empa hore a sokoloh'e 'me a phele. Ka baka leo, leha libe tsa rona li ka ba ngata joaloka lehlathatse le lebopong la leoatlle, kapa li ka ba kholo kapa li le khubelu joaloka mali, re ka khutlela ho Morena Molimo, ea tla re amohela ka thabo, 'me ea tla hlakola libe tsa rona, a re leballe tsona.

Erekaha re sa tseba na re tla shoa neneng, bohlale ke ho phela ka ho loka tataisong ea Kriste, eo e leng tsela, 'nete le bophelo ba rona. 'Me ha re ka khopjoa tseleng, re tsebe hore sakramente ea poelano e teng eo ka eona re ka khutlelang ho Molimo.

Evangelii e kajeno e tiisa linnete tseo re qetang ho li hlalosa. Ba sebeletsang Morena Molimo ka molomo feela ha ba na ho ea leholimong. Bakriste ka lebitso feela ba ka reng "E", Morena, ke teng, kea tla,, ke il'o sebetsa tsimong ea hao ea morara,"empa ha ba ee. Mohla kahlolo ba tla araba, ba re'ng? Ba tla leka ho hlalosa mabaka a kang a na: "Re ne re sa tsebe hore re etsa phoso" "re ne re hloka sebaka, ka baka la malapa a rona le mesebetsi e meng," "re ile ra khelosa ke mehlala e mebe," "re ile ra tšaba mahlo a batho," "e ne e le hona re itokisetsang ho lokisa taba tsa rona."

Empa moahloli a ke ke a amohela boitatolo bona, o tla re: Nako ea mohau e felile. E se e le nako ea kotulo, nako ea ho arola mofoka ho koro, nako ea toka.

Ka lehlohonolo, re sa ntsane re phela, 'me leha eba re ile ra re; "Kea hana,"nako e sa le teng ea ho mathela mohaung oa Molimo. Batho ba bangata ba ile ba etsa joalo pele ho rona, ba re file mehlala, joaloka Matheus oa mokhafisi, Maria Magdalena, Augustinus, le beatsalibe ba bangata ba ileng ba baka, bao re ba tsebang kapa bao re sa ba tsebang.

Re ile ra amohela pitso ea Molimo eo ho sebetsa tšimong ea hae ea morara mohla Hlatsuo ea rona. Haeba re e-s'o ka re ea, a re potlakeleng ho etsa joalo.

Rona bohle, a re leboheleng Morena Molimo ea re fileng tlhokomeliso ena e matla kajeno, e leng pontšo ea mohau oa hae o se nang moeli ho rona.

Bahalaleli har'a Beke

28	Loetse	Tetta
29	Loetse	Dadas
30	Loetse	Jerome
1	Mphalane	Virila
2	Mphalane	Leger
3	Mphalane	Menna

Khanya Production e itokisa likatleho

Tšeliso Thakholi

Bahlahisi le bahlophisi ba bacha haholo selika-likoeng sa 'mino toropong ea Teyateyaneng ho hlaha mokhatlong oa Khanya Cartel Production(KCP), ba re thota e sa namme feela ha ho moo ba potlaketseng teng ntlheng ea kholo ea 'mino, 'me boikemisetso ke bo tiileng ba ho bona libini tsa Lesotho li ena le boiphihlelo li bile li le hloahloa ka letsatsi le leng.

Ho ea ka e mong oa batsamaisi ba bacha haholo tlhahisong ea 'mino, John Lebetsa 'TKC' ka moo ba moreneketsang ka teng mabaleng a 'mino, o re KCP e shebane haholo le talenta ea bacha moo ho batlang ho le bobebe ho laola le ho betla talenta ea bona nakong ea bocha ba bona.

A supa hore nako ea bocha ke ea bohlokoa haholo litabeng tsa 'mino, kaha e ba otla le ho ba tataisetsa bokamosong bo chabileng joaloka ho ba bontša bohlokoa ba ho ba ruta 'mino le mekhabo e kenyeletsoang pineng, e kang ea lithoko le lithothokiso ha motho a bina. A thatiselletsa ka hore "bohlo ba batho ba

ratang ho ithuta le libini tse seng li ntse li bina ho hlaha mafapheng a fapakaneng a 'mino, re ba thusa ka ho ngola lipina kaha e le hona ba ntseng ba ithuta." A rialo. A bontša hore ba boetse

le tse phahameng ka ho ngola lipina, kaha ba ntse ba etse hloko hore ba kena likolo, 'me lithuto tsa bona li lokeloa ho hlompheua ba tle ba tsebe ho atleha likolong tseo ba kenang ho tsona. A

O bontšitse hore haele bakeng sa barutoana le baithuti ba ntseng ba kena likolo, likoetliso le mekete ea bona ha ngata ba e tšōara ha likolo li koetsoe ho ba bana ba ba le nako e ngata,

qetella ka hore bacha ba rata 'mino oa Sotho Hip Hop e leng eona eo KCP e ba thusang ka eona haholo. A re ba boetse ba hlalahlisa le 'mino oa Jazz le House.

Tlatsetsong ea mosebetsi 'moho le eena e bile e le sebini se secha sa Sotho Hip Hop Thabiso 'The Big T' Seotsanyane, o re o nyahlalitse 'mino oa Jazz, 'me ha joale o kene talenteng ea hae ea 'mino oa Sotho Hip Hop, ho litsoaka, ho tjeka-tjeka lebitsong la Hip Hop, sepotjoa le sepantsula. "Sena ke se entse kamor'a ho fumana thupelo le tlhokomeliso ke KCP hore hantle talenta ea ka ke ea 'mino oa Sotho Hip Hop.

Seotsanyane o re thahasello ea hae e kholo ke ho ngola lipina e be oa li hlalahlisa, 'me sena ke seo a se khothaletsang ba bang ba libini tsa habo bona, hobane se bebofaletsa libini tse ngata haholo-holo boikemelong ba motho ka mong. "Libini tse ngata li lahleheloa ke litsebo le talenta ka ho be sale lingolloa nako e kholo le e nyane, 'me sebini se lokela ho ba le thahasello le lerato talenteng ea hae." O boletse joalo a bile a phethela ka hore ba hlalahlisa le 'mino oa House le ho amohela limemo tsa meketeng le malapeng ho ea natefisa.



ba thusa le bana ba hlalhang likolong tsa mathomo

tiisa hore 'mino le lithuto ke kobo le lemao!

'me sena se fa bacha nako e lekaneng ea tlhabollo. A

O re Basotho ba tšehetse Likuena

Tšeliso Thakholi

President ea Mokhatlo oa Lesotho oa Bolo ea Maoto(LeFA), Li-jane Nthunya o entse ko-

po-thapeli ho 'Muso oa Lesotho ho lokolla basebeletsi bohle ba sechaba malakaleng ka ho fapakana ho ea tšehetsa sehlopha sa Naha sa Likuena ha se tla be se bapala le sa Atlas Lion ea Morocco lebaleng la Toyota, Afrika Boroa ka la 29 Loetse monongoaha, li-

papaling tsa ho phunyaletsa ho kena Mohopeng oa AFCON 2027.

Mokhahlelong oa A moo naha ea Lesotho e pannoeng le Niger, Gabon le Morocco, o re Lesotho le tla qala ho betla tsela ea lona ea ho leba lipapaling tsa AFCON 2027 ka ho thulana le

Niger mafelong ana a beke, papaling e tlang hoba Accra, Ghana. Bekeng e hlahlamang ea la 29 Loetse, President Nthunya o kopetse basebeletsi bohle ba 'muso matsatsi a phomolo bakeng se ho ea tšehetse Likuena papaling ea eona ea bobeli e tlabeng e le Mangaung.

Leha Atlas Lion e le sehlopha se matla tikolohong ea Afrika, kaha se hlaha mae-mong a pele lethathamong la Mokhatlo oa Afrika oa Bolo ea Maoto(CAF), ha Mokhatlong oa Lefatše oa Bolo ea Maoto(FIFA) se le boemong ba botšela, naha ea Lesotho e boitokisong bo matla haholo ho lokiset-sa papali ena, e shebiloe ka leihlo le nchocho kaha e le eona e ka fang Lesotho monyetla oa ho fetela lipapaling tsa AFCON 2027. A kopa le litho tse khabane ts paramente ea Lesotho ho reka litekete ho ea tšehetsa Likuena ha e tla be e kolokochana le Tau ena ea Atlas.

O re hang kamorao hore Lesotho le koebane le tau ena ea Atlas le tla amohe-la Niger lebaleng la Toyota hona Mangaung, 'me a

ipiletsa ho Basotho ho ea tšehetsa sehlopha sa Naha sa Likuena. Leha President Nthunya a e ntse kopo e khethehileng ho bohle ho tšehetsa sehlopha sa naha, o bontšitse ngongoreho ea hae e kholo ea hore e be lipapali tsohle tsa Likuena li ntse li bapalloa kantle ho Naha ea Lesotho, ka lebaka la maemo a hloabaetsang a lebaka le leholo la Setsotso.

A ipiletsa ho President ea Setsi LSRC, Baba Malephane ho kenya 'muso chofa ho bona hore lebaka la Setsoto le ea ntlafatsoa ho le beha maemong a machaba, kaha mokhatlo o kena litšenyehelong tse kholo ho tšoarela lipapali kantle ho naha, le hore Basotho ba bangata ba sitoa ho tšehetsa sehlopha sa bona le ho lahleheloa ke menyella ea khoebo le bohahlali.

Ho feta mona, Mokoetliso oa Naha Bob Mafoso o phatlalalitse lethathamo la mapomelo la bahlankana ba 25 ba tlang ho e hlana-ka lipapaling tsa Niger le Morocco, ba seng ba bile ba kaletse nonyana-tšepe ka Mantaha bekeng ena ho leba naheng ea Ghana, moo ba tlang ho qala leeto la bona la AFCON 2027 hona teng.



B'a kiba-kiba

Tšeliso Thakholi

Kamor'a hore Mokhatlo oa Le-sotho oa Bolo ea Maoto(LeFA) o etse nalane ka ho khakola mpho ea seapali sa let-satsi e seng e tloaelehileng ka ho bitsoa 'Stanlib Man of the Match', libapali tse tšeletseng tsa Liki e Kholo ea Vodacom tse kenyelet-sang khalala ea mehleng ea LMPs Rabooama 'Ma-saena' Koloti, ke bona bo pulamaliboho ba Liki e Kholo ka ho ikhapela lekhetlo la pele chelete e kaalo ka M1,000.00, seapali ka seng kamor'a ho ipabola li-papaling tsa pele tsa liki tse tsoa feta.

Khalala ena ea bolo ea maoto e tummeng ka ho bapala bolo e tsoileng mat-soho Rabooama Koloti ea

seng a le sehlopheng sa Limkokwing University, o ile a ikhapela mpho ea chelete e kaalo ka M1,000.00 ea hoba seapali sa letsatsi, kamor'a hore a hlabe lintlha tse ntle haholo tse peli na-kong eo sehlopha sa habo



se neng se bapala le sa Manonyane, moo lihlopha li ileng tsa qetella li bapetse ka seahlolo sa 2-2.

Seapali se seng se kotsi haholo se ikhapetseng chelete e kaalo ka M1,000.00 ke Thabang Klaas, ho hlaha ho bompoli ba mehleng ba Liki e Kholo ea Vodacom e leng Lioli 'Tse Nala'. Klaas o ikhapetse mpho ena na-kong eo sehlopha sa habo se neng se teteke ntle ho qenehelo sa Machokha ka phafa ea 5-0. Machokha ha ea qala lipapali tsa eona hantle papalisong le ngoa-hola, moo kamor'a ho ba-pala lipapali tse tharo tsa pele tsa Liki e neng e se e tsorame kaholimo lokong. Monongoaha e bonahala e qalile e hula ntoa ka lithako tsa morao.

Sibusiso Nkhetsoa oa 'Ibanoyi' Lifofane ke e mong oa ba hapileng khau ea 'Stanlib Man of the Match' kamor'a hore ba ikutloise monate ka ho pola Mem-



bers ka thupa ea 2-0. Lifofane e bonahala monongoa-ha ena le matšoao a ho hula ka boima, kaha papaling ea eona ea pele ea liki e kha-kathiloe ke Manonyane ka 4-0, ha e hlahlamang e ile ea masoloa 2-1 ke Matlama e qalileng lipapali tsa eona ka makhethe a maholo.

Haele mohlabana-lintlha oa beke le beke ea seng a ntse a tsebahala, e leng

Moeketsi Sekola ho tsoa sehlopheng sa Bantu, ke eena ea ileng a hapa mpho ea Stanlib ha bane ba et-soa ka lesoba la nale ka ho hlola LMPs 'Semonye' ka ntlha e bohloko ea 1-0. Ka ho hlola papali ena Bantu e atlehile ho matlafatsa mae-mo a eona lokong, kaha e se e nyolohetse maamong a bobeli ka ho hapa lipapa-li tse tharo ea bapala ka ho lekana ho le 'ngoe ena le litlha-kholo tse leshome ka mokotleng.

Libapali tse ling tse hloahloa tse hapileng mpho ea Stanlib ke Pheko 'Skipper' 'Molaoa oa sehlopha sa Linare nakong eo sehlopha sa habo se neng se makat-sa barati ba bolo ba bangata ka ho hlola Majantja ka 3-2. Ha oa ho qetela e le Thabo Moleleki oa LCS ea ileng a bontša boiphihlelo papaling ea bolo ea maoto, ha bane ba bapala le sehlopha se secha haholo kahare ho Liki e Kholo mongongoaha sa Mzamane, seo ba ileng ba se amohela ka ho se shapa 2-0.

Ho latela tumellano lim-pho tsena tsa Stanlib li tlii'o fanoa ho seapali se tlang ho ipabola papaling ka 'ngoe ea Liki e Kholo ho fihlela liki eba e fela selemong se tlang ka Motšeanong. Ho sa le joalo, lipapali tsa Liki e Kholo li tlii'o tsoela pele ka la 3 Mphalane, kamor'a ho khafutsa ha nakoana ho fa sehlopha sa naha ho ea itokisetse le ho ea bapala li-papali tsa AFCON 2027.

Tsona li tla ema tjena: Lifofane vs Machokha, LCS vs Matlama, LMPs vs Majantja, FC Summit vs Members, Limkokwing vs Linare, Bantu vs Mzamane, Lijabatho vs Lioli le LDF vs Manonyane. Haele papali ea Lijabatho le Manonyane e tla bapaloa ka la 7 Mphalane, ha ea Matlama le Lijabatho e tla bapaloa ka la 14 Mphalane. Lipapali tsena ke tse neng li salletse morao nakong eo Lijabatho e ntseng e bapala lipapali tsa CAF Champions League, moo e ileng ea hloleha ho fetela mokha-hlelong o hlahlamang kamor'a ho hloloa ke CFFA ka karetsa ea 3-1.

LHDA e tšehetsa mabelo

Tšeliso Thakholi

Morero oa Metsi a Lihlaba tsa Lesotho(LH-DA) o khakotse selekane sa tšebelisa 'moho le Kampani ea Eventful Moment, bakeng sa ho tšehetsa litlhoso tsa mabelo a macha a bitsoang LHDA Mokhotlong Highlands Marathon a tlii'o tsoaroa selemo le selemo, tšebeliso e neng e tsoaretsoe Setsing sa Lipapali le Boithapallo sa Lehakoe, Maseru, ka la 23 Loetse monongoaha.

H'a bua le bapatlalatsi ba litaba tsa lipapali ba neng ba phuthehile ka bongata tšebeliso e neng e tsoaretsoe Mookameli oa LHDA, Monghali Tente Tente o itse khakolo ena ke e meng ea meralo eo seng ba e qalile ea LHDA, ea ho tsoaea lilemo tse 40 More-ro o sebeletsa Basotho ka lerato le ka boitelo. A re mabelo ana a mekhahlelo e fapakaneng a tlii'o fana ka mekhahlelo e mengata ea ho nyolla bohahlaoli le ho matlafatsa moruo bakeng sa setereke sa Mokhotlong.

A re a boetse a tlii'o theha menyetla e mengata ea tlhahiso ea mesebetsi bakeng sa sechaba sa Mokhotlong. A re a tlii'o kopanya limathi tse ngata tse tsoang kahare le kantle ho naha, le bopa sechaba ho se e tsa ntho e le 'ngoe le ho matlafatsa likhoebo tsa Basotho. A qetella ka hore LHDA e tšehetsa mabelo ana ka chelete e kaalo ka M300,000.00, 'me ke hona ba tla lula fatse le

bohle ba amehang ho lokisa litaba tse meputso bakeng sa bahloli.

Lebitsong la Kampani ea Evenful Moment, Monghali Tsoinyane Rapapa o lebohile le thoholetsa LHDA ka tšehetsa eo e faneng ka eona, ho holisa tšebeliso 'moho ea bona molemong oa ho matlafatsa papali ea mabelo. A re lebelo lena ha lena matlafatsa papali ea mabelo feela, empa le tlii'o holisa moruo oa naha le ho ntšetsapele kholo ea bohahlaoli kahare ho setereke sa Mokhotlong.

"Re amohela ka liatla tse peli monyetla ona oa ho ntlafatsa moruo le ho theha mekhahlelo ea boipheliso le ho tsebahatsa libaka tsa bohahlaoli le ho libeha maamong a holimo kahare le kantle ho naha."O bole-tse joalo a bile a phaella ka hore chelete e tšehetsang mabelo ana e tla aroloa ka mekhahlelo e 'maloa e kenyeletsang ea bana ea lebelo la bolelele ba 1.6km, la bolelele ba 5km, la 10km



le la bacha, banna le basali la bolelele ba 21.1km le le leholo le shebiloeng ka lei-hlo le nchocho la bolelele ba 42.2km le tlang ho tloha Sani le fella borokhong ba Senqu.

A tiisa hore mabelo a na a macha a tlii'o matlafatsa kholo ea moruo le ntšetsopele ea bohahlaoli seter-

aba. A ipiletsa ho Basotho bohle ho tšehetsa mabelo ana. Mabelo ana a tlii'o tsoara ka la 6 Tšitoe monongoaha, 'me a reretsoe ho matlafatsa bophelo ba Basotho, ho phamisa moea oa papali ea mabelo kahare ho setereke sa Mokhotlong le ho tsoma talenta molemong oa bokamoso ba bacha.

